



ज्वजलपा वाःपौ

JWOJALAPA WEEKLY

दैं ७ ल्याः ४३ (पूर्णडक १४५) ने. सं. ११३७ तछलागा नवमि आइतवाः २०७४ असार ०४ गते आइतवार (Jun- 18, 2017)

मू ढ १- पृष्ठ ६

किपू नगरपालिकापाखें स्वंगू पुखूयात कया पिथन सुचं



खासी बजाय् टहरा दयेकातःगु पुखू



जनप्रतिनिधि वये धुंकाः वडापाखें पिकाःगु सुचं

न्हापा हे तयातःगु सुचं

ज्वजलपा वाःपौ /

किपू नगरपालिकाया न्हूगु जनप्रतिनिधिपिं वये धुनेवं किपूया स्वंगू ऐतिहासिक पुखूप्रति ध्यान तःगु खनेदु । किपूया खासी बजारय् च्वंगु भिं पुखू, मभिं पुखू व खासी पुखू (लाभा पुखू)या सवालयात कया च्यूता प्वांकाः सुचं तर्क पिकाःगु दु । नगर पालिकाय् जनप्रतिनिधित मदुगु अवस्थाया नं तत्कालिन किपू

नगरपालिका वडा नं. ५ लागाय् लानाच्वंगु ऐतिहासिक पुखुलिङ फोर वायेगु, सामान तयेगु नापं मुंकेगु ज्या यानाच्वंगुलिं अज्वःगु कथंया छुं नं ज्या मयायेत इनाप याना सुचं तिकूगु खः ।

उगु सुचंयात बेवास्ता यात धाःसा स्थानीय स्वायत्त शासन ऐन २०५५ या दफा १६५ कजं जरिवाना सहित कारवाही जुइगु जानकारी बियागु सूचं किपू नगर

पालिकां पिकाःगु खः । अबले पिकाःगु सुचंपाखें खास हे छुं नं लिच्वः मलाःगु खः । टहरा दयेका तयेगुनिसें सामान तयेगु ज्या तर्क निरन्तर रुपं जुयाच्वंगु खःसा आः धाःसा जनप्रतिनिधित वये धुंकाः मेगु न्हूगु सुचं पिकया तिकेगु ज्या तर्क याःगु दु । किपू नगर पालिका वडा नं. ३ अन्तर्गत खासीबजारय् च्वंगु भिं पुखू, मभिं पुखू व लाभा पुखुलिङ २०७२

वैशाख १२ गतेया विनासकारी भुखाय् वये धुंकाः निर्माण याना तःगु टहरा व निर्माण सामान थ्व हे २०७४ साल असार महिनाया १० गते तकया दुने थःथःगु टहरा व निर्माण सामान चीकाः ऐतिहासिक पुखूया सौन्दर्य यथावत यायेगु ज्याय् ग्वाहालि यायेत फुक्क वडावासीयात सूचना बियागु नापं उगु ईया दुने नं टहरा चीकेगु ज्या मयात

धाःसा वडा कार्यालयपाखें चीकेगु जुइ नापं उगु ज्याया खर्च व जिम्मेवारी तर्क स्वयं हे जुइ धकाः वडा नं ३ पाखें सुचं जारी याःगु खः । अथे जनप्रतिनिधित वये धुंकाः सुचं जारी यायेवं टहरा चीकेगु ज्या सरोकारवालातय्सं याःगु खने दुसा उगु पुखूयात आः गज्वःगु योजना दयेका वनीगु खः धकाः सार्वजनिक

सुचनाय् उल्लेख यानातःगु खने मदुनि । थुगु ल्याखं स्वल धाःसा किपू नगरपालिकाय् जनप्रतिनिधित वये धुंकाः आः कारवाही जुइ धकाः मनूत ग्याःगु खनेदुसा न्हापा कर्मचारीतय्सं नगर पालिका संचालन यानाच्वंगु अवस्थाया धाःसा मर्यासे हे च्वनाच्वंगु खनेदु धकाः धायेछिं ।

इनाप

ज्यापु समुदायया प्रतिस्थित व्यक्तित्वतय्गु सफू पिकाय्गु निंतिं क्वय् न्ह्यथनाकथंया विधाय् दुध्याःपिं व्यक्तिपिसं थःथःगु बायोदाता (C.V) इलय् हे बियादीत इनाप यानाच्वना ।

१. मन्त्री, २. सभासद ३. राजदूत, वाणिज्यदुत, कन्सुलर, ४. पि. एच. डि. डाक्टर ५. एम.बि.वि.एस डाक्टर, बि.ई नर्सिंग, डेन्टिस्ट, फर्मासेप्ट, ६. बि.ई. इन्जिनियर, ७. प्राध्यापक क) स्कूल (मास्टर डिग्री) ख) विश्वविद्यालय ग) चार्टर्ड एकाउन्टेन्ट, लेखा परिक्षक (मास्टर डिग्री) ९. न्यायाधीश सिनियर अधिवक्ता, १०. पाइलट, ११. सेकेण्ड क्लास अफिसर, नेपाल सरकार व वित्तिय संघ संस्थानया क) जि.एम. ख) सि.ई.ओ, ग) सेकेण्ड क्लास अफिसर, १२. फाइन आर्ट, १३. कलाकार, १४. खेलाडी १५. उच्चपदय् च्वना समाजसेवा, १६. उच्चपदय् च्वनाः विभिन्न विधाय् ज्यायाय् धुंकूपिं

स्वापूया निंति

नजरराम महर्जन

निखासी, न्हूबजाः, किपू-१०

फोन नं. ९८४१४०१०७७

‘भाषिक पत्रकारिताया राष्ट्रिय सम्मेलन यायेमाः’



ज्वजलपा वाःपौ

नेवाः पत्रकार राष्ट्रिय दबूया योजना व अनुगमन विभागया ग्वसालय् शुक्रवाः यलया तम्कः द्यः परिसर य् प्रेस काउन्सिलया न्हूम्ह नायः भवानी प्रसाद बरालयात भिंतुना देछयेगु व ‘थौया इलय् नेपालभाषाया पत्रकारिताय् हाथ्या व हिउपाः’यात कयाः छगू अन्तरक्रिया ज्याभवः जूगु दु ।

उगु ज्याभवलय् दबूया न्वकू सुरजवीर बज्राचार्य छगू ज्यापौ न्ह्यव्वयादीगु खः । ज्याभवलय् ईलोहं प्रकाशनया नरेशवीर शाक्य, अप्सरा वाःपौ व नेवाः अनलाइन न्यूजपाखें विजयरत्न असंवरे, भवत जिल्लापाखें दलुचा लय्पौया सम्पादक रमा कर्णजित, तिकिभ्याः वाःपौपाखें रत्नकाजी मन, सम्यक वाःपौया सुगतरत्न सिन्दुराकार, लहना वाःपौया व्यवस्थापक सुरेन्द्रभक्त श्रेष्ठ व महासचिव सुनिल महर्जन अले प्रेस काउन्सिलया दुजः मयजु सुभेच्छा विन्दुपिन्सं नेवाः पत्रकारिताया थीथी पक्षयात कयाः कुलादीगु खः । दबूया योजना व अनुगमन विभागया कजि नृपेन्द्रलाल

श्रेष्ठया सभानायःसुइ न्ह्याःगु ज्याभवलय् नेवाः पत्रकार राष्ट्रिय दबूया केन्द्रीय नायः श्रीकृष्ण महर्जनं प्रेस काउन्सिलया नायः भवानी प्रसाद बरालयात भिंतुना पौ लःल्हानादीगु खः । ज्याभवलय् थःगु नुगःखं तयेगु भवलय् प्रेस काउन्सिलया नायः भाजु भवानी प्रसाद बरालं थः न्ह्यावलें भाषिक पत्रकारिताया विकासया पक्षय् दूगु खं कनादिसं धयादिल, ‘नेपालभाषा व मेमेगु भाषाया पत्रकारिता यानाः वयाच्वंगु दक्क मिडियायात मुनाः छगू राष्ट्रिय स्तरया भाषिक सम्मेलन यायेफःसा उकिं यक्व हे न्हून्हुगु व माःगु खं पिहां वइ ।’ थज्याःगु राष्ट्रिय सम्मेलन पितहःगु खँया आधारय् भाषिक पत्रकारिताया निंतिं भविष्यय् गज्याःगु पलाः छीगु पार्थिछ जुइ धैगु खँया निर्णय याये अपुइगु खँयं नं प्रेस काउन्सिलया नायः बरालं वः बियादीगु खः । वय्कलं प्रेस काउन्सिलयात पुनर्संरचना यायेमाःगु अले संघीयताय् मुलुक वने धुंकूगु अवस्थाया प्रदेश स्तरीय नं कान्सील दयेका केन्द्रय् छगू याना च्यागू दयेकेमाः धइगु पक्षय् थः दु धकाः नं धयादिल ।



ज्वजलपा वाःपौ

सल्लाहकार
श्रीकृष्ण महर्जन
प्रकाशकः

नजरराम महर्जन
सम्पादक

श्रीकृष्ण तण्डुकार
ले-आउटः

ज्वजलपा डेस्कटप
संवाददाता

भरत महर्जन, निरजमान सिंह
थाक्

प्रिन्ट स्काई, यें

ज्याकूः निखासी त्वाः किपू नपा-३

फोन ल्याः ४३३३००७, ९८४९४०९०७७

ई-मेल : jwojalapaweb@gmail.com

सम्पादकिय

सम्मान यायेगु व कायेगु

वंगु वैशाख ३१ गते स्थानीय तहया न्हापांगु चरणया चुनाव जुयाः स्थानीय तहलय् निर्वाचित जनप्रतिनिधित वयधुकल । चुनाव त्यानां वःसेनिसे जनप्रतिनिधिपिन्त भिन्तुना बिइगु व सम्मान यायेगु ज्या मदिकक जुयाच्वंगु दु । गबले स्कुलयासा गबले सहकारी संस्थापाखें, गबले सामाजिक संघ संस्थाया आयोजनाय् जुयाच्वंगु खनेदु । कपाः जायक सिन्हल तिकाः, गपः जायक स्वामालं क्वखाय्का, गनं नेवाः परम्पराकथं ख्यै सगं बिया भिन्तुना नापं हनाः वयाच्वंगु दु ।

चुनावया इलय् सुनां सुयात भोट बिल व गोप्य खैं खः । थौकन्हे चुनावय् त्यानावःबलय् सकसेन भिन्तुना बिइगु व हनेगु ज्या यानाहःगु दु । थुकिया अर्थ खः चुनाव ल्वाइबलय् छगू पार्टीया चुनाव चिं कयाः ल्वाःसां आः त्याना वयधुकाः सकसियाम्ह जुल धइगु संकेत खः । आः थःगु पार्टी धकाः छगू जक पार्टीया पँलिनाः वहे पार्टीया जक लँपु ज्वना जुइमज्यू । छाय्थाःसा गुलि भोट थः त्यात । अले थः विपक्षीया गुलि भोट दु । चुनावय् बूपिनिगु भोट छथाय् तयाः ल्याखाय्गु खःसा त्यानावम्हसिया स्वया बूपिनिगु भोट अप्वः दुगु खनेदु । थुकिं छु सिइकेमाः धाःसा थः अल्पमतय् दु ।

जनतां त्यानावःपि पदाधिकारीपिन्त भिन्तुना बिया सम्मान याइगुया अर्थ खः वयकःपाखें जनतां भिगु ज्याया यक्व आशा यानाच्वंगु दु । यदि व जनताया आशाकथं ज्या याय् मफुत वा मयात धाःसा मेगु चुनावय् जनतां वयाके बदला काय्फु । चुनावला न्यादैय् छकः जुयाच्वनी । उकिं सम्मान कयाः जक ई छयाय्गु मखु । ज्या याय्गु इलय् सम्मान काः जुइगु मखु । ज्या यायेगु ईलिपा जक सम्मान काय्गु ज्या याःसा बोलाई ।

गजल शौरभ शाक्यया

गजल-३४



वइगु मिखालय्, जायेक लःखना
नुगः मछिंका ख्वइच्वंगु, वः खना ।
वसन्त रितुया, सिरि सिरि फसय्
सिमाया क्वसं, हायाच्वंगु हःखना ।
वइगु इहिपाया भ्वजय्, गुलि न्त्याइपु
नापलाक्वःपासापिं, अप्वःजि थःखना ।
मनहे मखं कथं, व थासय् लात जि
हुलमुल दथूइ, न्हिलाच्वंगु छः खना ।
नुगःतसकं चितासु मदु, ज्या छुं मदु
छ खनेवं छत्थुं, आसया जः खना ।

स्थानीय निकाय नेपालभाषा व नेवाःतय्गु सरोकार



श्रीकृष्ण महर्जन

स्थानीय तहया निर्वाचन न्हापांगु चरण क्वचाये धुसानिसं नेवाः समुदाय दुने नेपालभाषायात नगरपालिकाय् लागूया सवालय् तसकं सरोकार क्यनेगु व थवं थवलय् सहलह ब्याकेगु ज्या याःगु दु । उलि जक मखु कि थनि भिन्त्यादै न्हयः स्थानीय निकायसं स्थानीय भाषा छयले मदु धकाः सर्वोच्च अदालतं फैसला याःगु दिं जेठ १८ गते अले उकुन्हुयात हाकूगु न्हिया रुपय् हनेगु कथंया छुं नं गतिविधि तस्कं जूगु खनेमन्त ।

स्थानीय तहया निर्वाचन क्वचाये धुनेवं यें महानगरपालिका व किपू नगर पालिकांया बोर्ड बैठकं औपचारिक रुपं हे सरकारी कामकाजया भाय् नेवाः भाय् नं यायेगु धकाः निर्णय यायेवं नेवाःत लयताया हाकूगु न्हिया औचित्य मदुगु तायेका उगु कथंया ज्याभूवः मयाःगु खयेमाः धकाः तस्कं धायेगु यानाहःगु दु । अथे खःसा आःया अवस्थाय् यें महानगरपालिका व किपू नगरपालिकाय् जक नेवाः भाय्यात मान्यता बिल धाःसां नेवाःतय् गाःगु खःला धकाः तस्कं न्हयसः ब्वलना वःगु दु ।

थनिं १८ दै न्हयः यें महानगर पालिकां, राजविराज नगरपालिकां व धनुषा जिल्ला विकास समितिपाखें मातृभाषायात थःथःगु लागाय् खस नेपाली भाषाया लिसेलिसं थप अधिकार या भाषा कथं यें महानगरपालिकाय् नेपालभाषा, राजविराज नगरपालिका व धनुषा जिल्ला विकास समितिइ मैथिली भाषायात स्थानीय भाषा कथं मान्यता ब्यूगु विरुद्ध सर्वोच्च अदालतं २०५६ जेष्ठ १८ गते च्वंगु न्यायाधीश निम्ह कृष्णजंग रायमाझी व टोपबहादुर सिंहया मंकाः इजलासं थुकथं ब्यूगु मान्यता खारेज याःगु खः ।

उगु न्हिनिसं दैय् दसं जेष्ठ १८ गतेया न्हियात नेवाः समुदायपाखें हाकूगु न्हि कथं न्यायेकाः वयाच्वंगु खः । आः हाकनं स्थानीय निकायसं स्थानीय मातृभाषायात प्रयोग यायेगु सवालय् गुगु कथं नेवाः समुदाय दुने बहस जुयाच्वंगु दु थ्व नेवाःतय्सं थःगु भाषायात कया क्यनाच्वंगु च्यूताः हे खः धकाः धायेफइ । अले आःया अवस्थाय् म्होतिं नं नेवाःतय्सं स्वनिगः दुनेया नगरपालिकाय् जक नेपालभाषायात नं

सरकारी कामकाजया भाय्या रुपय् मान्यता बिइमाः धकाः तायेकाच्वंगु दु । यदि स्वनिगःया स्थानीय तह नगर पालिकाय् जक नेपालभाषा यात नं कामाजि भाषाया रुपय् मान्यता बिइगु खःसा बहुसंख्यक नगरपालिकाय् औपचारिक रुपं मान्यता बिइगु धकाः निर्णय याकेगु हे ल्यंदनिगु अवस्था खः ।

यें जिल्लाया यें महानगरपालिका व किपू नगरपालिकां निर्णय याये धुकूगु दुसा न्हापा हे यल उपमहानगरपालिका (थौकन्हय् यल महानगरपालिका)य् न्हापा हे निर्णय याना तये धुकूगु दु । न्हूगु संरचना कथं जूगु स्थानीय तहया निर्वाचन कथं यें जिल्ला दुने छगू महानगरपालिका नापं भिंछगू नगर पालिका दुथ्यानाच्वंगु दु । यें महानगर पालिका, किपू नगरपालिका, कागेश्वरी मनहरा नगरपालिका, गोकर्णेश्वर नगरपालिका, तोखा नगर पालिका, चन्द्रागिरी नगरपालिका, तार्केश्वर नगरपालिका, दक्षिणकाली नगरपालिका, नागार्जुन नगरपालिका, बुढानिलकण्ठ नगरपालिका व शंखरापुर नगरपालिका दु । अथे हे यल जिल्ला दुने धायेगु खःसा यल महानगरपालिका, गोदावरी नगर पालिका, महालक्ष्मी नगरपालिका दुसा ख्वप जिल्ला दुने ख्वप नगरपालिका, चांगुनारायण नगरपालिका, मध्यपुर थिमि नगरपालिका व सूर्यविनायक नगर पालिका दुथ्यानाच्वंगु दु ।

थुगु ल्याखं स्वल धाःसा यें जिल्ला दुने निगू नगरपालिकाय् मान्यता बिइ धुकूगु दुसा आः गुंगू नगरपालिकाय् ला नेपालभाषायात सरकारी कामकाजया भाषाया रुपय् मान्यता बिइगु ल्यं हे दनि । अले यल जिल्ला दुने धायेगु खःसा न्हापा बियातःगु मान्यतायात आधार कायेगु खःसा छगू महानगर पालिकाय् मान्यता दु तर आः दयेकूगु न्हूगु निगू नगरपालिकाय् नेपालभाषायात सरकारी कामकाजया भाषाया रुपय् मान्यता बिइकेगु ल्यंदनि । उगु हे कथं ख्वप जिल्लाया मुक्कं यान प्यंगू नगर पालिका दुसा व प्यंगू नगरपालिका मध्ये छगू नगरपालिकां तस्कं नेपालभाषायात मान्यता बिउगु मदुनि ।

न्हापा दुगु निगू नगरपालिकां नं ब्यूगु मदुसा आः हाकनं थप जूगु निगू नगरपालिकां नं मान्यता बिउगु खने मदु । थुगु ल्याखं स्वल धाःसा नेपालभाषायात सरकारी कामकाजया भाषाया रुपय् स्थानीय तहलय् मान्यता बिइकेगु खःसा ख्वप जिल्ला हे दक्ले कमजोर जुयाच्वंगु दु । गुगु जिल्लाया मेमेगु जिल्लाया तुलनाय् अप्वः नेवाःत दु उगु हे जिल्लाया नेवाः भाय्यात मान्यता बिइकेगुलिइ ल्यूने लानाच्वंगु खने दु ।

जारी जूगु संविधानं स्थानीय भाषाया संरक्षण व विकास यायेफइगु खैं स्पष्ट रुपं स्थानीय तहपाखें यायेफइगु उल्लेख यानातःगु दुसां नं नेवाः भाय्यात स्वनिगःया स्वंगू जिल्लाया नगरपालिकाय् हे औपचारिक रुपं मान्यता बिइकेगु ज्या नेवाःतय्सं याये फयाच्वंगु मदु अले स्वनिगःया बहुसंख्यक नगरपालिकाया नेवाः जनप्रतिनिधितय्सं तस्कं माःगु कथंया चासो तयाच्वंगु खने मदु ।

थुगु ल्याखं स्वल धाःसा स्थानीय तहलय् तस्कं नेपालभाषायात मान्यता बिइमाःगु आवश्यकता मदु धकः स्वयं नेवाःतय्सं हे तायेकाच्वंगु जकं मखुला धकाः न्हयसः ब्वलनीगु स्वाभाविक हे खः । यदि भाषिक अधिकारया नितिं न्ह्याः वनेगु खःसा संविधानं बियातःगु अधिकारयात तस्कं छयला वनेगु सवालय् नेवाः न्हयलुवातय्सं पलाः ल्हवाना वनेमाःगु अले नेवाःत सचेत जुइमाःगु खः अथे माःगु कथं जुयाच्वंगु मदु । थौं स्वनिगःया स्थानीय तहलय् ला नेपालभाषायात मान्यता बिइकेगु सवालय् माःगु कथं कुतः याये मफुपिन्सं कन्हय् वना ३ नम्बर प्रदेशय् नेपालभाषायात मान्यता बिइकेगु ज्या गुगु कथं याइगु खः शंका हे दु धाःसां छुं पाइमखु ।

छुखे मान्यता बिइका उकियात प्रयोग यायेगु सवालय् समस्या दु अले माःगु कथंया कुतः जुयाच्वंगु मदुसा मेखे मान्यता बिइकेगु सवालय् आः स्थानीय तहलय् ला वेवास्ता याइपिं नेवाःतय्सं कन्हय् वना प्रदेशय् गुगु कथं कुतः याइ धकाः आशा यायेगु खः । प्रदेशय् बहुसंख्यक जनतां ल्हाइगु भाय्यात भाषा आयोगया सिफारिस कथं मान्यता बिइगु खैं न्हयथनातःगु दु । उकिं आः प्रदेश हे निर्माण मजुनिगु अवस्थाय् प्रदेशय् अधिकार कायेगु तापाःगु खैं खःसा स्थानीय तहलय् ला नेवाःत दन धाःसा थत्थें हे कायेफइगु अवस्था दु ।

आःया अवस्थाय् स्वनिगःया फुक्क स्थानीय तह अर्थात नगरपालिकाय् नेपालभाषायात आधिकारीक भाषाया रुपय् मान्यता बिइकेगु जक मखु आर्विल थःपिनिगु नगरपालिकाय् माःगु जनशक्ति धइगु नेपालभाषा नं सःमह जुइमाः धकाः निर्णय याका वनेमाःगु अवस्था दु ।

अथे जुल धाःसा जक थःगु भाय् ल्हाना नं म्वाना नयेफइ धकाः मनूतय्सं तायेकी अले स्वनिगलय् वयाच्वीपिं नेवाः मखुपिन्सं नं नेवाः भाय् सयेकेत बाध्य जुइ । उकिं थ्व इलय् नेवाः न्हयलुवात, भाषिक कार्यकर्ता, राजनीतिक पार्टीया नेवाः कार्यकर्तानिसं फुक्क नेवाःत गम्भीर जुया न्ह्याः वनेमाःगु अवस्था दु मखुसा कन्हय् प्रदेशय् ला भन हे अधिकार काये थाकुइ धकाः थुइकेमाः ।

कीर्तिपुर नगरपालिकां विद्युत प्राधिकरणया प:खा थुन



ज्वजलपा वा:पौ/

किपू न.पा. ल्या: ९ त:ग:वपिया लिक्क विद्युत प्राधिकरणया भवन व सामानतय् प:खालं ग्वयात:गु थाय् किपू नगरपालिकां थुना बिउगु दु ।

व पर्ति जग्गाय् त:दँ न्त्य:निसें विद्युत प्राधिकरणं नितजा:गु टहराथे दनां ज्या यानां वयाच्वंगु ख: । थ:गु जमिन मखुगुलिं बांलाक दय्कूगु नं मखु । हाकिमत च्वनेत थाय् मगानां मेपनि छैय् कोठा बालं कया: ज्या याना वयाच्वंगु ख: । कीर्तिपुर नगर पालिकां असार १ गतेनिसें किपूया रिंगरोड त:व्या: याय्गु उकिं थ्व विद्युत प्राधिकरणया भवन चिकेत सूचं विउगु ख: । जेठ ३१ गते

तकया म्याद बियात:गु ख: । म्याद दुने छुं नं मया:बलय् असार १ गते मेयर रमेश महर्जनया नेतृत्वय् डोजरसहित व:गु कर्मचारीतय् पुचलं न्हापां विद्युत प्राधिकरणया प:खा त:छ्याना बिउगु ख: । उगु इलय् प:खा त:छ्याय् दइमखु धका: विद्युतया कर्मचारीत हा:व:गु ख: । छभा:ला नगरपालिकाया कर्मचारीत व विद्युतया कर्मचार ीतय् दथुई कच कच हे जुल । प:खा जक थुनेधा:पिं नगर पालिकाया डोजरं विद्युत प्राधिकरण दुहाँ वनेगु गेट नापं स्येका: बिउगु दु । आ: विद्युत प्राधिकरणया सामानत लावारिसथे जूगु दु । व सामानत खुया: यंकीगु यक्व सम्भावना दु धका: विद्युत प्राधिकरणं चिन्ता का:गु दु ।

किपूया रिंगरोड १४ मिटर यायेगु धका: २०५५ सालय् हे किपू नगरपालिकाया जनप्रतिनिधितसें निर्णय याना तय् धुंक्कू जुयाच्वन । अय्सां उगु थाय् चीके मफया च्वंगु । आ: वयातिनि बल्ल चिकेगु ज्या जुल । आ: नं भिन्हुया ई बिउगु दु । भिन्हुया दुने थ:पिन्सं हे छै थुनां मयंकल धा:सा नगरपालिकां छैय् नापं थुनाविइगु ख्या:च्व बिउगु दु । विद्युत प्राधिकरणं त:दँ न्त्यो हे थ:गु भवन दयकेगु धका: राहालित स्कुलया लिक्क छुगामय् नितजा:गु छैय् नं दयक्कू ख: । तर थौतक व भवन बांलाक पूर्वक्कू मदु । सायद भवन दतकि थनं दनांवने माली धका: ख:ला ? न्त्यागु थजु आ: याकनं व भवन बांलाका थाय् त्व:ता विइमाल ।

मङ्गल बहुमुखी क्याम्पसया साधारण सभा



किपूया न्हूवजारय् च्वंगु मङ्गल बहुमुखी क्याम्पसया साधारण सभा म्हिग: सनिवा सुथय् त:धंगु ज्याभव: याना क्वचाय्कल । उगु ज्याभवलय् क्याम्पसया आजीवन सदस्यत वंगु वैशाख ३१ गतेया चुनावं त्यानां:पिं कीपू न.पा.या मेयर रमेश महर्जन, वडा नं.२ या वडाध्यक्ष रमेशमान डंगोल, वडा नं.१० या वडाध्यक्ष अमन महर्जन व वडा नं. १० या सदस्य हरिशरण महर्जन, नागार्जुन न.पा. वडा नं. ९ या न.स.स. र मेश्वरी ठकुराथीयात भिन्तुना नापं सम्मान नं या:गु ख: । क्याम्पस व्यवस्थापन समितिया नाय: प्रा.डा. शिवशरण महर्जनया नाय:सुइ जूगु उगु सभाया उलेज्या मूपाहाँ सांसद राजन के.सी. त्वारवालय् मत च्याका: यानादीगु ख: । व्यवस्थापन समितिया न्वकू प्रा.डा.श्यामकृष्ण महर्जन लसकुस न्वचू बियादीगु ख: ।

व्यवस्थापन समितिया नाय: प्रा.डा. शिवशरण महर्जनं वार्षिक प्रतिवेदन बियादीगु ख: । उगु प्रतिवेदन कथं मङ्गल मा.वि., मङ्गल उ.मा.वि. जुया वयागु स्तरोन्मुख जुया क्याम्पस जुगु ख: । २०५८ सालं मंगल मा.वि. नेपा:या सामुदायिक विद्यालयत मध्ये दक्कलय् बांला:गु र ष्ट्रिय पुरस्कार त्याकुसैलि उच्च मा.वि.या स्वीकृतिका:गु ख:सा २०६१ सालय् नं उच्च मा.वि. तहलय् सर्वोत्कृष्ट जुया राष्ट्रिय पुरस्कार त्याकेत ता:ला:गु ख: । अनलि २०६४ सालय् मङ्गल बहुमुखी क्याम्पसया स्वीकृति का:गु ख: । उगु इलय् नं त्रि.वि. तय्मा:गु

धरौटि दाँ किपूया शिक्षासेवी, समाजसेवीपनिपाखें धेवा मुना: धरौटि त:गु ख: । न्हापां वि.एड. जक संचालन या:गु ख:सा वि.एड. जक संचालन यानां खर्च गाके मफुगु व विद्यार्थीतय्गु माग विविएस नं जूगुलिं विविएस नं थपय् यानागु खं कनादिल । विश्वविद्यालय अनुदान आयोगं साधारण सभा याना साधारण सभाया निर्णय कथं छु गुलि सहयोग मा:गु ख: योजना दय्का हचि धा:गुलिं थ्व साधारणसभा यायेमा:गु खं न्हयथनां दिल । साधारण सभाया लागि साधारण सदस्य माल । वहे कथं किपूया समाजसेवी, शिक्षाविद व बुद्धिजिविपिं सकलें यानां २१५ म्हाति आजीवन सदस्य दय्का: थ्व न्हापांखुसि साधारण सभा यानागु खं कनादिल । उगु ज्याभवलय् मूपाहाँ सांसद राजन के.सी. साधारण सदस्यपिन्त दसिपौ नं ल:ल्हाना दीगु ख: । सांसदपिं राजन के.सी., सांसद श्याम श्रेष्ठं क्याम्पसया भौतिक पुर्वाधारया निति थ:पिनिगु सभासद कोषं आर्थिक ग्वाहालि यायेगु वचं बियादिल । अथे हे मेयर र मेश महर्जनं किपूयात शैक्षिक हव दयेकेगु निति मंगल क्याम्पसं ग्वाहालि यानाच्वंगु, याकनं हे नगरपालिकां योजनां दय्का: किपूया शैक्षिक संस्थातय् बांलाक न्त्याका यंकेगु जुइ धयादिल । मेम्ह पाहाँ खुल्ला विश्वविद्यालयया उपकुलपति प्रा.डा. लेखनाथ शर्मा नं मङ्गल बहुमुखी क्याम्पसनाप सहकार्य याना वनेगु जुइ धयादिल ज्याभव: सिद्धिवहादुर महर्जनं न्त्याकादीगु ख: ।

आरजु न्हापांम्ह मिस

नेवा: पूर्वान्चल

तछलागा पारु ११३७ (जुन १० २०१७)

न्हापांम्ह मिस नेवा: पूर्वान्चलया उपाधि आरजु श्रेष्ठं त्याकेत ता:ला:गु दु । नेवा: देय् दबू भापाया ग्वसालय् थौं भापाय् क्वचा:गु मिस नेवा: पूर्वान्चलय् त्याकामि आरजु श्रेष्ठं उपाधिलिसें ३१द्व: तका सिरपा: नं ल्हातय् लाकूगु दु ।

अथे हे ल्यू ला:म्ह भरना श्रेष्ठं २१द्व: तका सिरपा: त्याकूगु दु । अथे हे लियांल्यू सन्जिता श्रेष्ठं धा:सा ११द्व: तका सिरपा: त्याकूगु दु । त्याकामिपिन्त तका सिरपा:लिसें नर्सिड ब्वनेगु निति छात्रवृत्ति नं ब्यूगु दु ।

कासाय् कासामिपिन्सं थीथी विधाय् थीथी सिरपा: त्याकूगु दु । नेवा: देय् दबू भापा जिल्लाया नाय: दिनेश श्रेष्ठया नायकय् क्वचा:गु ज्याभवलय् ज्याभव: कजि तिल रुपा श्रेष्ठं लसकुस यानादीगु ख: । ज्याभव:या मू पाहाँ नेवा: मिसा दबूया नाय: लिसें नेवा: देय् दबूया केन्द्रिय दुज: रश्मिला प्रजापतिं भिन्तुना न्वचुन बियादिल ।

ज्याभवलय् नेवा: देय् दबूया केन्द्रिय न्वकू कृष्ण उदास, केन्द्रिय दुज: सुन्दरी श्रेष्ठ, शसस्त्र प्रहरीया डिएसपि बालकृष्ण श्रेष्ठ विशिष्ट पाहांकथं उपस्थिति दुगु ख: ।



नेवाः लहनाया न्हूगु पलाः, अवकाश व बिदाई स्वम्ह कर्मचारीपिन्त अवकाश व बिदाई यासैं उपदान लःल्हात



ललेन्द्र शाक्य

थनि १९ दै न्ह्यः किपू नगरपालिका १ वडा थांबहाः त्वालय् त्वाःबाःया जः दुजःपिं मुनाः सामुदायिक रुपं पलिस्था याःगु नेवाः लहना थौकन्ह्यु किपूया जक मखु, हलिन्त्यकं हे बय्-बय् जुइत ताःलाःगु छगू नेवाः तजिलजिया धुकू खः ।

नेवाः लहनाया मुक्कं थांबहाः त्वाः लाग्ना दुने थीथी नेवाः तजिलजि, संस्कृति व नेवाः परम्परा, रितिथितिलिसैं नेवाः संस्कारया ज्वलन्त चिंत आन्तरिक व वाह्य पर्यटकपनिगु नितिं न्ह्यब्वयातःगु दु । थ्वहे हुनि नं नेवाः लहना हलिन्त्यकं बय्-बय् जुइत ताःलाःगु खःसा अन स्वदेशी जक मखु आपालं विदेशी पाहाँपिं वये वनेगु यानाचवंगु दु । खुल्ला संग्रहालयया रुपं पलिस्था याःगु उगु नेवाः लहनाय् त्वाःया काय् मचा ल्याय्म्हपिं व भौमचापिं कर्मचारी जुयाः ज्या यानाचवंगु दुसा ज्याथः-जिथिपिं नं कर्मचारी जुयाः ज्या यानाचवंगु दु । थ्वहे भवलय् नेवाः लहना संचालक समितिं ज्या सनाः वयाचवंगु कर्मचारीपिं मध्ये ६५ दै पुलेधुकूपिं कर्मचारीपिन्त स-सम्मान अवकाश विइगु ज्या नं थनिनिसैं न्ह्याकूगु दु । थ्वहे भवलय् नेवाः लहनाय् १० दै न्ह्यःनिसैं ज्या सनाः वयाचवनादीम्ह हिरामाया महर्जनलिसैं प्यदैनिसैं न्यादैं तक ज्या यानाः नेवाः लहनायात योगदान बियादीपिं धनमाया महर्जन व दानबहादुर महर्जनपिन्त नेवाः लहना अवकाश ब्यूगु दु ।

ने.सं. १९३७ तछलागा पंचमि (जेष्ठ ३१ गते) बुधवाः नेवाः लहना संग्रहालय दुने छगू तःजिगु ज्याभवः यासैं वय्कःपिं ज्याथःपिं कर्मचारीपिं हिरामाया महर्जन, धनमाया महर्जन व दानबहादुर महर्जनपिन्त स-सम्मान अवकाश व बिदाई विसैं हनेगु ज्याभवः याःगु दु । वय्कःपिन्त नेवाः लहनाय् वय्कःपिन्सं यानादीगु योगदानया कदर स्वरुप उपदान कथं नगदलिसैं हनापौ नं लःल्हाःगु खः । भाजु मानवं नेवाः संस्कृति, नेवाः नसात्वसाविसैं मुक्कं नेवाः तजिलजिया विश्वय् छगू यां छगू जक नमूनाया रुपं नेवाः लहनायात विकास यायेमानीगु प्रतिबद्धता प्वकादिसैं नेवाः लहना छगू प्रतिष्ठाया त्वाः खः धकाः धयादिल । ज्याभवः नेवाः लहनाया नायः राजमान महर्जन 'मानव'या सभानायःसुइ न्ह्याःगु खःसा वय्कलं अवकाश विइमाःगु विषयस व नेवाः लहनालिसैं मानव दर्शनया खँ न्ह्यब्वयादिसैं अवकाश कयादीपिन्त उपदान कथं नगद व हनापौ लःल्हानादीगु खः ।

ज्याभवलय् नेवाः लहनाया दुजःपिं यमुना महर्जन, सुशीला महर्जन, ललिता महर्जनलिसैं थीथी व्यक्तित्वपिन्सं थःथःगु नुगःखँ तयादीगु खः । ज्याभवलय् मुक्कं नेवाः लहनाया जः दुजःपिनिगु उपस्थिति दूगु खःसा ज्याभवः नेवाः लहनाया हे दुजः सरलगोपाल महर्जन न्ह्याकादीगु खः । नेवाः लहनाया थुगु पलाःयात कयाः छगू न्हूगु आयाम व न्हूगु पलाःया रुपं नेवाः लहना छयूगु कथं काःगु दु । थथे ज्याथः जिथिपिन्त सम्मान यायेगु धैगु गर्वया विषय जूगु व थुगु पलाःयात निरन्तरता बियातुं वनेमाःगु खनेदु धकाः अन उपस्थित दुजःपिन्सं धाःगु दु ।

किपू बजार व्यवस्थापन पाखें हना व भिंतुना

ज्वजलपा वाःपौ

किपू नगरपालिकाया निर्वाचित मेयर, उपमेयरनिसैं वडा अध्यक्ष व नगर सदस्यय् निर्वाचित जुयादीपिं जनप्रतिनिधितय् जनस्तरं न्हिया न्हिथं धाइथें हनेज्या यानाचवंगु दु । विशेष याना सामाजिक संघ संस्थानिसैं थीथी खलः पुचःत व सहकारीनिसैं स्कूलपाखें तक हनेज्या यानाचवंगु दु ।

थ्व हे भवलय् कीर्तिपुर बजार व्यवस्थापन समितिपाखें स्थानीय तगिया निर्वाचनपाखें लोकं ह्वाकाः किपू नगरपालिकाया मेयर पदय् त्याकादीम्ह रमेश महर्जन, उप मेयर सरस्वति खड्का, वडा ९ या अध्यक्ष गंगाराम महर्जन, वडा १० या अध्यक्ष अमन महर्जनपिन्त जेठ ३० गते भिंतुना देछासे हना-पौ लःल्हानाःकिपू नगरपालिका सभा कक्षय् हनेज्या जुल ।

नेवाःलागाय् नेवाःपहिचान, रचनात्मक जागरण अभियान, आधारभुत विकास, सुशासननापं चुस्त प्रशासनिक नेतृत्व यायेत ताःलायेमा धकाः किपू बजार व्यवस्थापन समितिपाखें आपलंआपाः भिंतुना देछासे हनापौ लःल्हागु दु । समितिया सचिव नरेश महर्जन न्ह्याकादीगु हने ज्याभवलय् समितिया अध्यक्ष बुद्धिमान महर्जन हना-पौ लःल्हानाःदीगु खः ।

वडा अध्यक्ष गंगाराम महर्जन, अमन महर्जनपिन्सं फोहरमैला, बजार व्यवस्थापनय् माःगु ज्यायानाः वनेगु वचन बिया दीगु दु । उपमेयर सरस्वति खड्का बजार व्यापारया दृष्टिकोणजक मखु सेवा भावना नं तयाः गुणस्तरि य सामान मिइगु यात धाःसा बजार बांलाइ धयाः दिल ।

मेयर रमेश महर्जन लोकतान्त्रिक चोकनिसैं तःगःवपी(नगाँदोपा)तकया टेलिफोन, विद्युत, केबुलया जालीथें अशोभनीय जुयाचवंगु तार व ट्राफिक, व्यवस्थापन, विद्युत प्राधिकरण कार्यालय सरे यायेगु, सडक मत तयेगु, पार्किङयानापं पेटि दयेकेगु, सिसि क्यामरा जडान याना अमलिस-तःगःवपी बजार लागायात २ निर्दया दुने किपूया छगू नमूना बजारया रुपय् न्ह्याकेगु वचन बियादीगु दु ।



तपाईंको टोलमा भएका घटना कीर्तिपुरको समाचार बनाउने
हो भने तपाईं एक कल फोन गर्नुस् हामी तपाईंको टोलको
समाचार कीर्तिपुरको समाचार बनाईदिनेछौं

कीर्तिपुर सन्देश साप्ताहिक



कीर्तिपुरको चित्रण

किपुलिं पिदनाचवंगु कीर्तिपुर सन्देश वाःपौ व ज्वजलपाः वाःपौया ग्राहक जुइगु नितिं स्वापू तयादिसैं

कार्यालयः निखासी टोलः कीर्तिपुर नपा-३
फोन नं. : ४३३३००७, ९८४९४०९०७७

ज्वजलपा वाःपतिइ छिगू चिनाखँ/बाखँ/हाइकू विज्ञापन
व मेमेगु च्वसू पिथनेगु जूसा जिमित स्वापू तयादिसैं

सकलसिगु मंकाः सः



ज्वजलपा वाःपौ

ज्याकूः निखासी त्वाः किपू नपा-३ फोन ल्याः ४३३३००७,
९८०८६२६४२० ई-मेल : kirtipur_sandesh@live.com

साहित्य उपन्यास – जन्ति न्त्यात

च्वमि– मदन गोपाल प्रधान “क्वाःघासा”

६ खुब्ब:- १

न्हियान्हिथं थें मनमाया निभाः मत्ववं हे दनां वसिबँ पुइ धुंकाः ख्वाः सिलाः निलः कयाः हल । पुजा कुथिइ वन । पुजाभः निपाः तल । छपाः पुजाभः पुजाकुथिइ ब्वयाः तःपिं गनेद्यः, भिन्द्यः, सुर्द्यः, भगवती आदि द्यःपिं पुजा यायेत छेल । छें च्वपिं द्यःत पुजा याये धुंकाः मेगु पुजाभः खःगु ल्हाःतिं ज्वना, “बिन्हाय् बि” धाधां क्वहाँ वल । दथु मातनय् थ्यंकाः धाल, “ए बाबु, जि छेके वने त्यना । कुने खापा चाः खंला ।” थुलि धयाः मनमाया छेके वन ।

न्त्यावलय्सं व हे इलय् छेके वनेत पिहाँ वने न्त्यः थःकाय्पात सुचं बिइगुलिं यानाः श्रीया नं वहे इलय् न्त्यलं चालिगु बानि जुइ धुंकल । थः मामं सुचं ब्यूगु वं ताः । न्त्यलं चाःसां लासा प्वालं दंगु मखुनि । थौं बिदा जूगुलिं नं दने हथाय् मचाः । फाङ्गां भुतुमातु भुनाः लासा प्वालय्तुं च्वनाच्वन, मिखा निगः पुलपुल कनाः ।

थौं सनिवार । क्याम्पसय् वने म्वाः । विद्यार्थीतय्त गथे यानाः बांलाक थुइके विइ फइ धकाः बिचाः यायेमाःगु नं मखु । क्लास कायेगु तन्ता मду । अय्सा नं वया मनय् खँ ल्हाना च्वंगु वयागु ख्वालय् खनेदुगु गम्भिर मुद्रां बांलाक हे सिइ दु । म्ह लासा प्वालय् सां मन वयागु थन थ्यं अन थ्यं मду । मिखा वयागु कोथाया प्यंगः अंगःया दुनेसां मनं गन गन खंका च्वन । म्हुतुं तमवासां मनं मनं थौं न्हिछिया कार्यक्रम दयेका च्वन । गबलें थन वनेगुसा, गबलें अन वनेगु, गबलें । थथे यायेगु सा, गबलें अथे यायेगु थथे यायेगु । अथे यायेगु, थन वने अन वने या श्रीया बिचाः नाप नापं ई नं न्त्याना च्वन ।

मूलुखा चायेका त्यूगु ताये दत । मिसातय्गु सःनं तायेदत । श्री थः मांया सःला सिइकाः काल तर मेगु मिसा सः सुयागु खः वं धाये मफुत । सिइकेगु कुतः नं मयाः । बरु मिखा तिसिनां लासा प्वालय् तुं सुंक च्वनाच्वन ।

“थौं खःला छिगु लँ स्वया च्वनागु । थौं भ्नाइथे कन्हय् भ्नाइ थें ।” धाधां मनमाया स्वानं थहाँ वल ।

“जि जक मन गनं च्वंधकाः, मनतता । कन्हय् हे वये धकाः वंम्ह थौं तक नं मवः । खँया भरोसा मदुम्ह धकाः छिं मतिइ तयाःदिइ धकाः जितः नं मनय् च्वं । तर छुयाये ? याकःमि । थुखे स्वःसा उखे स्वःमदु, उखे स्वःसा थुखे स्वःमदु । दक्व फुकक थःम्हं हे स्वय्माः । मेपिं सुं दुगु मखु । छिं सि हे स्यू । धाःगु इलय् मथ्यं धकाः तंचायादिइ मते । थौं लाकाः वय् हे धुन ।” धाधां मनमायाया ल्यू ल्यू मयजु नं थहाँ वल ।

“छाय् तं म्वयेके माःगु दु ? ज्या खं यानाः लिमलात जुइ धकाः जितः नं मनय् वं । थःम्हन्तुं खिनां नयेमाःपिं भी थथे हे ला खःनि । फासँ ।” धकाः केवरिखे स्वःगु कोथाय् यंकाः मयजुयात फ्यतुकल ।

ल्हाःतय् च्वंगु पुजाभःभु मनमायां भ्याःफुसय् वापाय् तल । फ्यतुना च्वंम्ह मयजुया न्त्यनेसं च्वंगु चक्तिइ फ्यतुत । अथें हे चकंगु ख्वालय् न्हिलां कःवलय् भन हे चतमतं धाःगु ख्वाः लुयाः मनमायां धाल, “ज्वना भ्नायागु दुला ?”

“थुलिमछि लिपा वायः नं ज्वना मवःसा छिं जितः ख्वा ख्वा मत्याइला काः । अथे जकं जि वये छाःला ?” चकनाचा पहलं ह्याउँ पालु ख्वाः च्याकाः मयजुं धाल । अले किपाः छपाः नं मनमायाया ल्हाःतिइ लःल्हाना विल ।

दङ्गजुयाः मनमायां किपाः काल । भुनां तःगु भ्वं लिकयाः किपाः छक्रः क्वथिइक स्वत । किपा स्वयाच्वंम्ह मनमायाया नुगलय् लसताया बाः वयाःच्वंगु वया ख्वालं धाः । लिपा हानं गबलें हे नं स्वये मखनि थें तुंक्क स्वया च्वन, च्याम्पति टक्कर कायेथें कयाः । गुलि स्वल उलि हे स्वयाः च्वने थें जुयाच्वन । स्वःलिसे स्वये मगाना च्वन । न्त्याक्व हे स्वःसां स्वये लुमधना च्वन । किपाः स्वया च्वंम्ह मनमाया थः हे किपाः थें च्वंक टक्क च्वनाः स्वयाच्वन ।

“जिं उखुन्हु हे धयागु मखुला छित, मिसामचा अपसरा थें च्वं धकाः ? मच्वंला, मनतता ?” मयजुया न्त्यसलं किपाः स्वया च्वंम्ह मनमायाया ध्यान भंग जुल । मयजुं छु धाः थें च्वं तर छु धाःगु मथुया मनमायां धाल, “ज्यौं छु धयादियागु थें ?”

“मचा बांमला ला धयागु का ?”

“मचा ला नाकं हे बांला ।”

“अय्सा क्वःछिइगु गबलय् याये मालि, मनतता ?” जिजक ज्यूसा मनमायाया आः थथें हे क्वःछिनां ज्या खँ सिधयेके मास्तिवः जक वयागु । बिचाःयागु खँ जूसा किपाय् च्वंम्ह मिसामचा वया भौमचा जुइधुकल धकाः घासां जिल । तर बूगु जा ला काचाक्क नये थाकु धाःसा मसिइ तलय् ह्वना च्वने माम्ह भौमचा ल्ययेगु चि पालु न्यायेथें मखु । अयजूगुलिं हथाय् चाःगु मनयात चिनाः मनमाया छुं बिचाः याम्ह थें सुंक च्वन । मयजुया न्त्यसःया लिसलय् मनमायां छुं खँ ल्वःमंम्हं थें याना धाल, “पलख दिसँ । च्या छक्रः निं दयेका हये । प्वाःहे खस्स भिन । खँ धैगु ला ल्हानावं च्वने । गन वनि धका, मखुला मयजु ? स्वौदँले, छम्ह दु लासा प्वालय् थ्यंक यंकाः च्या विइ मयंकुतलय् दना हे वइमखु ।”

मनमाया दनाः तले थहाँ वन । छेके वने न्त्यःहे लः दायेकाः थर्मसय् तया तःगुलिं लः दायेका च्वनेगु तन्ता याये म्वाःम्ह मनमायां ख्यँय् छगः काल । ख्यँय् काला च्वंम्ह याकनं हे थः अजि जुइदइगु कल्पना याना च्वन । उखे मयजुया नं थःगु ज्या फते जुइगु तायेकाः मथ्यंक फ्यतुना कोथाय् उखे थुखे स्वया च्वन ।

“बिन्हाय् बि ।” धाधां मनमाया क्वहाँ वल । स्वानं क्वहाँ वःगु सः दिइ मलाःनि थें च्वं मनमाया कोथाय् खने दयेक वये धुंकल । ख्यँय् व च्याकपत दुगु किस्ति कोथाया कुनय्सं च्वंगु टेबूलय् दिकल । अले ख्यँय् व च्या छगू कपं मयजुया न्त्यने न्त्यच्याकल । थःतनं छगू कप च्या कयाः फ्यतुतुं धाल, “भपिया दिसँ । ख्वाउँसे च्वनि ।”

“म्वासां म्वासां मनततायात जक दुःख बिइथें जुल । थय् सनाः च्वना दिइ हे माःगु मखु ।” धकाः मयजुं औपचारिक्ता ब्याकल ।

“छुकिया दुःख ? छु दु धकाः ? च्या छगूला खःनि । भपिया दिसँ । च्या न्त्यने मथ्यंतलय् लासा प्वालं दनिमखुम्हेसित छगू नं विया वये । छि भपिया दिसँ ।” धकाः धयाः च्या छगू कप ज्वना मनमाया श्रीया कोथाय् वन । “ए बाबु, दँ । च्या थन दु । ख्वाउँइ ।” धकाः धाधां कोथां पिहाँ वल ।

लमि मयजु च्या मत्वंसे सुंकन्तुं च्वनाः च्वंगु खनाः च्या त्वनादिसँ धकाः इनाप यायां मनमाया थःगु थासय् फ्यतुत । न्त्यनेसं च्वंगु च्या कप ल्हवन । मयजुं नं ख्यँय् दुगु रिकापिइ ल्हाः न्त्याकल । निम्हं च्या त्वना च्वन । च्या त्वना च्वंम्ह मनमायाया मिखा क्वय् तयातःगु किपाय् ।

च्या त्वने धुंकाः मयजुं धाल, “कासा मनतता, मचा थ्व हे खः । छिगु छु बिचाः ?”

जिगु छु बिचाः धाये । जिगु बिचाःला छिं सिल हे जुइ । धया च्वनेमाःगु ला खैमखु थें च्वं । अय्सनं बिहा याइम्हेसित थ्व किपाः क्यने । अं, बरु जातःया नक्कल छगू नं दःसा ज्यू । ज्वना भ्नाःगु खैला थें ?” कथहं ……

हलिं नेवाः गुथि किपू कचां किपुली याःगु “भिके-ल्हवने-न्हूधाः यायेनु”छुयों तया चिनाखँ गोष्ठी ब्वंगु चिनाखँ छुसिंकथं पिकया वनेगु तातुना थ्व चिनाखँ न्त्यव्वयागु खः

४५.गथे यानाः ल्हवने

नरेनमान

खाःसि, किपू

(९८५११ ६५९००)

तबः मदुपिं नायःत खवः मदुगु खापाःथें । गुबलय् छु धाइ सिइ हे मखु, गुबलय् हे खापाः तिइ फुगु मखु । खं जकः वय्-वय् ज्या दक्वः क्वय्-क्वय् । थ्व तालं गुबलय् च्वन्त्याइ भीगु देय् । देय्पातः थाय् हे धुंकलला लँ हे मलनीगु ल्वय् । गुबलय् थुइकी थःसिकं तधं थःगु देय् । हाकःगु पिनेया खँ सीकेतः

घौ बाघौ मवीगु इलय् लोकयात मिंखाः कंकातल छिमिसं बुलुगु लखय् ? दंद हे दत स्यंगु आय् हे बुल भिकेगु गुबलय् ? चलं वनाः गां मंत, खुसि बालं तां मंत । ज्या मवः पुचः नीस्वना दां मंत, इलय् ज्या मजुया देय्पा नां मंतः । थःत कायेगु खँय् न्त्याबलें हे छिपिं छप्पँ जुइ । लोकयात बिइगु खँय् न्त्याबलें छिपिं ल्वापु जुइ, छाय् ? लोकयात लिधंसा हे मदुसा ?

तिवः तःगु हे फुसुलुसा ?

मुलु छम्हसिके, सुका मेम्हसिके, भलसा गन दइले सा ? थः भाय् मल्हाःपिं थः मनुतः, थवं थः मधापिं थःथितितः । अलय् गथे यानाः न्त्याइ भीगु भाय् भीगु तजिलजित । सीकादिसँ

थःगु म्हसीकासिकं अप्वः खः जुलकि ।

थगु म्हसीकं ताहाकः थःगु किचः जुलकि ।

थुइकादिसँ निभाः विइन ।

भुतुलिइ मिँ मच्याःगु न्हिल्याः पतिनय् मन्त्यनाः

अंगलय् ताः कियातःगु नं बुलुयावन ।

लिधंसा बी धकाः आशां क्यपिं

त्वालय् दुहांवयेगु नं तापानाः वन ।

इलं लाकाः वंकुगु दुनुगःया घाः

हानं कुंखिनिपिं सतिना च्वन ।

ल्याखय् मदुगु ल्हाःचिं तयाः

भ्वं बियाः थकागु नं दँबदं हे क्यन ।

जि म्ह फु, मफुया खँ

सुनां गुबलय् जिके न्यन ?

पित्याः प्वाः, ह्वगंगु पुलि,

भुलि(भुलि वसः

अनेतने ल्वचं पुन ।

देय् भिकेतः दक्वः छप्पँः छधी जुयेमाल ।

पौजक ल्हवनाः मजिल

जग हे न्हूगु तयेमाल ।

सुना वः (ग्वाहाली) बीगु भलसाय्

आः जि पियाच्वने ?

जिगु त्वाः जिगु देय्

आः फु-फुथें थःम्हं हे ल्हवने ।

४६. छुकिया थ्व म्हसिका

राम शरण महर्जन, बहिगां, किपू

थःगु छें पाःताः मेपिं भिकः जुइम्ह ई म्ह मस्यूम्ह चितासू हे मदुम्ह थःगु धर्ती मस्यूम्ह ।१।

सुयातं ल्हवंल्हवं मखं थः बागः जूगु हिस्याः मेपिंसं सर्वय् फूसां मस्यूम्ह मेपिं पोसय् याइम्ह ।२।

भ्वखाचं छें स्यं ल्वापुख्यापुं स्यन देय् म्हगस खः म्हं खँ स्वाइ सर्ग पाःताः ज्याखँ छुं याये म्वाःम्हं ।३।

च्वद्चःपिं थुपिं नालय् द्चनाः सिचुपिं थः जीवं गाःपिं गुच्चा म्हिती छ जि ला न्त्यलुवाः धकाः जूपिं ।४।

हि बाः न्त्याकुसां भुखाचं वासं थंसां स्व न्हाय्पं तहाः छं जिं ल्यःपिं न्त्यलुवाः भी छ्चनय् मुस्याः सीपिं ।५।
छेंया द्यः हेला वय्वय् मेपिनि थिति छें स्यं, भाय् स्यं भं भिं मजू आत्मा स्यानाः भी जुल इलं थ्वाःपिं ।६।

भी धर्तीपुत्र जुइन इतिहास नस्वाः देय्पा चाः सांज छाःसां स्वयेगुला ? कतांमरी जुइगुला ? ।७।

भी दनाक्यने दुख कष्ट यानासां ई थःगु यानाः इलय् हे मति भिंका थःगु छें थःम्हं ल्हवने ।८।

सासः खः भीपिं नखःचखः, संस्कृतिं ल्वःमंके गथे ? न्हूधाः यायेनु थिति नुगः उलाः थवं थः ।९।

मति भी भिके पुर्खाया ज्याखँ ल्हवनाः छ जि मधाःसैं न्हूधाः यायेनु देय् नं म्हसिका ब्वयाः भीसं ।१०।

नेवाः पत्रकारपाखें बनेपाया मेयरयात सम्मान राजकुमार श्रेष्ठ अपहरणया खँय् नेवाः



ज्वजलपा वाःपौ

काभ्रेपलाञ्चोक जिल्लाया बनेपा नगरपालिकायात स्वच्छ व सुन्दर नगरपालिका दयेकेगु जुइ धकाः न्हूम्ह मेयर लक्ष्मी नरसिंह वाडे श्रेष्ठ धयादीगु दु ।

नेवाः पत्रकार राष्ट्रिय दबूपाखें भिंतुना बिइगु भवलय् वयकलं बुधवाः अथे धयादीगु खः । पत्रकार दबू काभ्रेपलाञ्चोक जिल्ला कचाया गवसालय् भिंतुना बिइगु भवलय् भवतय् वयकःया हे ज्याकुथिइ स्वांमाः खखायेका, खादां न्ययेका नापं हनापौ लःल्हाना मेयर लक्ष्मी नरसिंह वाडे श्रेष्ठ व उपमेयर रेखा दाहालयात हनेज्या याःगु खः । नेवाः पत्रकार राष्ट्रिय दबू काभ्रे कचाया नायः सिद्धिबहादुर कर्माचार्य, पुलांम्ह जिल्ला नायः रमा कर्णजित नं सहभागी जुयादीगु उगु ज्याभवलय् केन्द्रीय नायः श्रीकृष्ण महर्जन हनापौ लःल्हानादीगु खः । उगु इलय् सम्बोधन यासैं मेयर श्रेष्ठ बनेपाय् फोहर व लःया मूल समस्या जुयाचंगुलिं छुं ई लिपा हे समाधान यायेगु जानकारी बियादीगु दुसा ध्वनी प्रदुषणयात याकनं हे बन्द यायेगु, लँयात व्यवस्थित यायेगु नापं बनेपाया पहाडय् तःधंगु बुद्धया मूर्ति नं तयेगु जुइ धयादिल ।

अथेहे वयकलं नेवाः भाषा, संस्कृति नापं संचार ख्यःया नितिं नेवाः पत्रकार राष्ट्रिय दबूलिसे जानाः ज्या याना वनेत थः तयार दु धयादिल । अथे हे मंगलवाः जक काभ्रेपलाञ्चोक जिल्लाया धुलिखेल नगरपालिकाया न्हूम्ह मेयर अशोक कुमार व्याञ्जु श्रेष्ठयात नेवाः पत्रकार राष्ट्रिय दबूपाखें हंगु खः । वयकः व्याञ्जु श्रेष्ठ काभ्रेया वरिष्ठ नापं क्रियाशिल पत्रकार खः । दबूया केन्द्रीय नायः श्रीकृष्ण महर्जनया नेतृत्वय् हे अथे हनेज्या जूगु खः ।

देय् दबूपाखें भत्सर्ना

तछलागा षष्ठी ११३७ (जुन १६ २०१७),

तुलसीपुर नेवाः समाजया पूर्व नायः राजकुमार श्रेष्ठयात तत्काल अपहरणमुक्त यायेत नेवाःतय्गु राष्ट्रिय संगठन नेवाः देय् दबूलिं जोडदार माग याःगु दु ।

नेवाः देय् दबूपाखें छगू विज्ञप्ति जारी यासैं वंगु ज्येष्ठ २६ गते श्रेष्ठयात अपहरण यानायकाः थौतलें मुक्त मयाःगु खँय् नेवाःतय्गु राष्ट्रिय संगठन नेवाः देय् दबूया गम्भीर ध्यानाकर्षण जूगु धाःगु खः ।

उगु हे विज्ञप्तिपाखें दबुलिं समाजसेवी लिसें दाड तुलसीपुर या स्थानीय व्यवसायी श्रेष्ठयात अपहरणमुक्त याकेत सम्बन्धित निकाय व सरोकारवालातय्त जोडदार माग याःगु दु ।

अपरहरण थुज्वःगु ज्या कायरतापूर्ण जूगु धासैं नेवाः देय् दबुलिं विज्ञप्ति माफर्त अपहरणया ज्यायात घोर भत्सर्ना नं याःगु दु ।



तुलसीपुर नेवाः समाजया पूर्व नायः राजकुमार श्रेष्ठयात वंगु ज्येष्ठ २६ गते देय् दबू अपहरणमुक्त यायेत नेवाःतय्गु राष्ट्रिय संगठन नेवाः देय् दबूया गम्भीर ध्यानाकर्षण जूगु धाःगु खः । नेवाः देय् दबूया गम्भीर ध्यानाकर्षण जूगु धाःगु खः ।

उगु हे विज्ञप्तिपाखें दबुलिं समाजसेवी लिसें दाड तुलसीपुर या स्थानीय व्यवसायी श्रेष्ठयात अपहरणमुक्त याकेत सम्बन्धित निकाय व सरोकारवालातय्त जोडदार माग याःगु दु ।

अपरहरण थुज्वःगु ज्या कायरतापूर्ण जूगु धासैं नेवाः देय् दबुलिं विज्ञप्ति माफर्त अपहरणया ज्यायात घोर भत्सर्ना नं याःगु दु ।

अपरहरण थुज्वःगु ज्या कायरतापूर्ण जूगु धासैं नेवाः देय् दबुलिं विज्ञप्ति माफर्त अपहरणया ज्यायात घोर भत्सर्ना नं याःगु दु ।

धैर्यधारण यायेफयेमा



बुदिं : बि.सं.
२००० असार
१८ गते



मदुम्ह जगतबहादुर श्रेष्ठ

मदुगु दिं : बि.सं.
२०७४ असार
१ गते



थुगु सहलह तिबः धुकूया दुजः भाजु मदन श्रेष्ठया अबु व दुजः भाजु राजु श्रेष्ठया कका जगतबहादुर श्रेष्ठ वंगु ने.सं. ११३७ तछलागा खस्ति (२०७४ असार १ गते) बिहिवाः ७४ दँया बैशाय् आकाभाकां मदुगुलिं मदुम्हेसिया आत्माया चीर-शान्तिया कामना यासैं दुःखंकःपिं सकल छँजःपिन्सं धैर्यधारण यायेफयेमा धकाः मनंतुसैं श्रीश्रीश्री आःजु द्यःयाके प्रार्थना यानाच्चना ।

बिचाः हायेकूपिं : —————

सहलह तिबः धुकू
सकल जः दुजः